

lis Gnovis

■ UDIN. Messe par furlan



A Udin, la Messe par furlan e ven cjantade sabide ai 16 di Març aes 5 e mieze sore sere, li de capele «de Purità», daprûf dal domo (cun Radio Spazio che le trasmet sul moment). E compagnarà la celebrazion la Corâl San Pieri Apuestul di Tarcint. Al cjantarà messe bons. Luciano Nobile.

■ UDIN. A cressin i colomps



Biel che il numar dai citadins de capitâl furlane al fâs une fadie mostre a cressi, chel dai colomps, tai ultins timps, al somee in sumis che al cressi simpri di plui in numar, almanca a sintî no pôcs di lôr, che si lamentin parcè che in diviersis zonis de citât a'ndi cjatin simpri di plui. Une sensazion dome, o ju àno contâts? Dut câs si lamente che la cause di cheste incesitate e sedi l'amôr che cualchi citadin al à par chescj ucieluts cussi che, cuant che ju viôt a becolâ cence padin, ur zonte ancjemò un pocje di mangjative, par che no restin a sut. Il Comun al rispuint che al è di agnorums che al ten di voli lis colomberis e i lôr abitants, e al fâs ancje une campagne par tignîju a regjim cu la mangjative anticoncezionâl, ma su chel che a fasin cierts citadins nol pues doprâ il voli che i vanze. Dut câs, dal Palaç si zonte, cemût che si dis in chescj câs, che "La situazione è sotto controllo". Al semee insume che a Udin, dulà che la "mense comunâl dai colomps" ur furnis mangjative par cinc zornadis ae setemane, cualchi citadin al pensi, "sua sponte", che i ucieluts a sedin denudrîts, e cussi ur si zonte une buine man. A pensâ di fâ dal ben, cualchi volte si fâs piês.

■ TUMIEÇ. Si tornin a fâ i scarpets

Agnorums indaûr, cuant che si jere fruts, in ogni famee tu cjatavis cualchidun che al saveve fâ i stafets – chê volte ju clamavin cussi – massime lis nonis, che a costavin pôc e si podevin fâ doprant dute robe che e vignive riciclad, come la gome di biciclete e un blec di vilût che al vignive cusit su la suele cuntune guselone che e veve un fil di spali di chel grues. Par tant timp si è dismenteade cheste risorse de nestre culumie, che di un pôc di timp in ca e je tornade di mode, par vie che cualchidun si è inacuât che di scarpets si puedin fâ ancje di gale. A Tumieç a'ân pensât ben di organizâ un percors formatif par imparâ a realizâ scarpets cuntun program clamât "Scarpetti/Scarpets de Cjargne", metût adun dal Museu cu la colaborazion di altris Associazions dal puest, cun ben vincjedoi di lôr che a'ân partecipât cun passion. Une part di lôr e sarâ a Triest plui indevant par une zornade/laboratori, dulà che, cun zovins creatifs internazionâi, a crearan 18 pâr di scarpets, che po dopo a fasaran part di une mostre di pueste. E no si trate dome dal recupar, impuartant, di une tradizion che e stave par murî, parcè che si pense ancje di podê inviâ une formazion di secont nivel, cun chê di rindi cheste esperience une gnove profession. Lis nestris nonis a fasevin i scarpets di pocj palanchis; chei di cumò a costaran sigûr cualchi palanche di plui.

Miercus 13	S.te Cristine m.	Domenie 17	V Domenie di C.
Joibe 14	S. Lazar v.	Lunis 18	S. Ciril di Jerusalem
Vinars 15	S.te Luise di Marillac	Martars 19	S. Josef Spôs
Sabide 16	S.ts Ilari e Tazian	Il timp	Timp estrôs



Il soreli
Ai 13 al jeve aes 6.23
e al va a mont aes 18.11.




La lune
Ai 17 Prin cuart.

Il proverbi
Març al intenç
e Avrîl al lenç.
Lis voris dal mès
E je ore di semenâ artijocs, cesarons, vuainis,
cauliflôrs, fenoi, pevarons, salvie, savôrs.

Il profesor Remo Cacitti tra Vençon e Aquilee

Ai trê di Març dal an passât, a Milan, al murive ae etât di 74 agns



Il professôr Remo Cacitti

Ai trê di Març dal an passât al murive a Milan, ae etât di 74 agns, il professôr Remo Cacitti, vençonês, che il so non al restarà par simpri sculpit su chês pieris che il taramot dal '76 al veve sdrumadis e che lui, cun passion infogonade e cun inzen, al veve tornât a fâ vivi, tal doman di chê disgracie. Cacitti, laureât di pôc, al veve coordinât i voluntaris rivâts di ogni bande par salvâ lis oparis di art; al veve nomenât cun cure dutis lis pieris e po dopo al veve metût in cantîr un grant projet di ricostruzion partecipât cu la int, che al veve permetût di tornâ a fâ sù, in anastilos, il Domo di Vençon. E secont chel so balin che si veve di tornâ a fâ sù no cemût che al jere e dulà che al jere, ma pluiost cemût che al reste vuê cu lis cicatris des ofesis patidis, come chês che ancj lui al veve scugnût sopuartâ adun cun cetantis incomprensions, par puartâ a compiment il so projet. Lis veve ancje contadis tal libri "Le pietre dello scandalo" ("Lis pieris dal scandul"), che al fasê un biel scjas no dome in Friûl. Laureât in Storie dal Cristianisim ae Catoliche di Milan, Professôr Associât di Letterature Cristiane Antiche, espert de tradizion dal Cristianisim di Aquilee, de teologie dai martars e de tradizion judaiche cristiane, al jere di sigûr un dai interpretis plui innomenâts de Storiografie des originis dal

Il so non al restarà par simpri sculpit su chês pieris che il taramot dal '76 al veve sdrumadis e che lui, cun passion infogonade e cun inzen, al veve tornât a fâ vivi, tal doman di chê disgracie

Cristianisim di Aquilee e de sò storie, che cun lui e continuave la tradizion inviade di bons. Biasutti, e po dopo cjapade sù di pre Gilberto Pressacco, Renato Jacumin e di resint de professoressa Claudia Giordani cul so saç sul "Cristianesimo egiziano di Aquilea" ("Cristianisim egizian di Aquilee"). Meti adun la ricostruzion straordenarie dal centri e dal Domo di Vençon come promovi il scandai des originis cristianis di Aquilee – al à vût scrit un so arlêf, Gabriele Pellizzari – a forin, in fin dai conts, dome doi exercizis diferents di une stesse istance: chê di capi, valorizâ e progettâ la "identitât", presinte e vive, des feminis e dai oms dai nestris timps. Remo Cacitti nol lasse dome memorie, ricuarts, oltri al so contribût monumental su la ricostruzion di Vençon, ma un lassit di ricerçe e di produzion sientifiche di grant nivel e, in soreplui, il so grant impegn, une ereditât speciâl pal so Friûl, che e je chê di vè stabilit lis premissis par fâ de identitât

furlane un ideâl, cul vè ricognossût te antiche Aquilee cristiane la pussibilitât di un paradigme par un avignî cussient e coerent, infondât, ma no pierdût, tal mâr de complessitât e de indistinzion gjeneralizade dai nestris timps. Intun intervent che al veve fat te Glesie di Turide di Sedian ai 17 di Dicembar dal 2017, in ocasion dal vincjesim inovâl de muart di pre Gilberto Pressacco, a proposit di chê identitât che tant i tignive al veve dit: "La cusion si non in tiermins une vore sempliç: o si acetin a benefici di un presint cence contors e cence corelazioni, la dissoluzion de nestre identitât te "koiné" dal svilup, de tecnologie e de finance, o pûr si riclame cun fuarce il valôr de specificitât di cualsei culture tant che risultant di un lunc procès storic che nol pues jessi eliminât te assunzion di un presint come uniche dimension antropologjiche". Lui, il professôr Cacitti, cheste sielte le veve vivude ad implen par dute la sò vite.

Roberto Iacovissi

Tradizions furlanis dal mès par cure di Mario Martinis

CUATRI TIMPORIS DE VIERTE

Te setemane prime de seconde domenie di Cuaresime, la Glesie e celebra lis Cuatri Timporis di primevere (clamadis Reminiscere) pe preparazion spirituâl e fifiche des personis tal trapas de stagjon. Lis Cuatri Timporis a jerin i cuatri timps dal an mitûts daprûf la jentrade des cuatri stagjons (e cussi sistemadis dacis dai solstizis e dai ecuinozis) che, cun messis, rituâi di penitence, dizuns e preieris davuelts tes zornadis di miercus, vinars e sabide a intendevin tirâ dongje la benedizion divine sui prodots de tiere e, plui a larc, par rignovâ il spirt tal rignovasi des cuatri fasis dal cicli de nature. Sigurant il ritmi stagjonâl al timp spirituâl, lis Timporis a favorivin l'aderence des simboljiiis religjosis a chês de nature. Sigheduncje, lis Timporis no verin un significât solen di celebrazion di events cristologjics ma, lant passe la origjinarie ritualitât



pagane di celebrazion de nature, a cjaparin sù il profont significât cristian di preparazion fifiche (cui dizuns) e spirituâl (cu lis preieris) al straordenari avvicendament des stagjons che al puartave cun sé, passe che il cambiament dai cuadris naturâi e climatics, ancj il rignuviment biologjic da om. Fintremai ai agns Sessante dal Nûfcent, lis Cuatri Timporis (vuê dal dut scompariodis ancj te tradizion liturgjiche furlane) a jerin une vore seguidis in Friûl e in cualchi localitât pe ocasion si fasevin piçulis cuestulis (lis "Cuestulis des Cuatri Timporis") par ricompensâ il predi che al diseve messis e al faseve uficis religjôs in glesie o intal cimiteri pes animis dai muarts, considerâts simpri tutòrs dal cicli agrari e, propit par chest mutif, ricuardâts e preâts propit intes cuatri partis di trasmutazion stagjonâl de nature.